

- प्रदेश मांय होळी सिरधाभाव सागे मनायी जा रही है-शुभ मुहूर्त मांय होळी मंगळायी जावेला-काल धुलंडी रे मौके रंग खेल्यो जावेला।
- राज्य सरकार सीएनजी अर पीएनजी समेत न्यारी-न्यारी प्राकृतिक गैस रा मोल मांय कमी कीनी-नुवी रेट आज रात 12 बज्यां लागू व्हेला।
- प्रदेश रा केई हलकां मांय मौसम रो मिजाज बदल्यो-केई ठौड़ां तेज बायरा सागे बारिश व्ही-कठे-कठे ओळा पड़्या।
- इसरो स्पेस डॉकिंग एक्सपेरिमेंट मिशन रा तहत उपग्रहां ने न्यारा करण री प्रक्रिया कामयाबी सागे पूरी कीनी।

000

प्रदेशभर मांय आज रात शुभ मुहूर्त मांय सिरधाभाव सागे होळी मंगळायी जावेला। ई सारू न्यारी-न्यारी ठौड़ां होलिका सजाई ज्यी है। ई सागे ई न्यारा-न्यारा मिन्दरां मांय फूल बंगला समेत खास झांकियां सजायी ज्यी है। जयपुर रा गोविंद देवजी मिन्दर मांय खास धार्मिक कार्यक्रम राख्या जा रह्या है। जैसलमेर मांय लोक देवता बाबा रामदेव री समाधि ने फूलां ऊं सजायी ज्यी है। होळी रे मौके बाजारां मांय मिठाइयां, रंग, अबीर अर गुलाल री दुकानां माथे मोटी तादाद मांय लोग खरीददारी करता निजर आ रह्या है। मुख्यमंत्री भजनलाल शर्मा आज जयपुर रा सांगानेर मांय भारतीय जनता पार्टी री ओर ऊं राख्यी ज्यो होळी मिलन समारोह मांय सिरकत कीनी। इण ऊं पैली वे आज संवारे डीग जिला मांय पूछरी का लौठा रा श्रीनाथ जी मिन्दर मांय पूजा-अर्चना कर र प्रदेश मांय खुशहाली री कामना कीनी। मुख्यमंत्री भजन लाल शर्मा अर गृह राज्यमंत्री जवाहर सिंह बेढम लोगां सागे फूलां री होळी खेली। काल धुलंडी रे मौके रंग खेल्यो जावेला। प्रदेश रा न्यारा-न्यारा हलकां मांय अनूठा अंदाज मांय होळी खेली जावे है।

जैसलमेर मांय सीमा सुरक्षा बल-बीएसएफ रा जवान एक-दूजा रे रंग लगा र होळी मणाई। ई बीच, राज्य मांय सैर-सपाटा री ठौड़ां मोटी तादाद मांय सैलाणी पूग रह्या है। धुलंडी रे मौके होटलां मांय सैलाणियां सारू कुदरती रंगां अर हर्बल गुलाल सागे रेन डांस अर संगीत रा खास इंतजाम करी ज्यो है। पाली जिला रा जवाई अर रणकपुर मांय इंग्लैंड, फ्रांस, ऑस्ट्रेलिया अर जर्मनी समेत न्यारा-न्यारा देशां री घुड़सवार महिलावां रो दल मारवाड़ अर गोडवाड़ हलका री परम्परागत होळी खेलण सारू आयो है। म्हाणा सवाईमाधोपुर खबरनवीस बतायो के रणथम्भौर राष्ट्रीय उद्यान अर चम्बल घड़ियाल सेक्चुरी ने निरखण सारू ई सैलाणी पूग्या है।

होळी ने ध्यान राखता थकां प्रदेश मांय हिफाजत रा खास इन्तजामात् करी ज्यो है। पुलिस रा अहलकार अर जवान पूरी सावचेती राख रह्या है। राजधानी जयपुर मांय अभय कमांड सेंटर ऊं पूरा शहर री निगराणी राख्यी जावेला। ड्रोन कैमरां री मदद ऊं निजर राख्यी जावेला। होळी रा त्यौहार रे मौके खाद्य विभाग री टीमां खाण-पीण री चीजां मांय मिलावट करण वाळां रे खिलाफ कार्यवाही कर रही है।

बारां जिला रो नामी फूल डोल लोक उत्सव आज कलश यात्रा सागे सरू व्ह्यो। म्हाणा खबरनवीस बतायो के 21 मार्च ताई चालण वाळा ई उत्सव रे दौरान भांत-भांत रा सांस्कृतिक कार्यक्रम राख्या जावेला।

राज्य सरकार री कम्पनी राजस्थान स्टेट गैस लिमिटेड—आरएसजीएल कंप्रेसड नेचुरल गैस—सीएनजी समेत डीपीएनजी, सीपीएनजी अर आईपीएनजी प्राकृतिक गैस 2 रु. 12 पैसे प्रति किलोग्राम सस्ती कीनी है। आरएसजीएल रा चेयरमेन टी. रविकान्त बतायो के नुवी रेट आज रात 12 बज्यां लागू व्हे जावेला। ध्यानजोग है के मुख्यमंत्री भजनलाल शर्मा विधानसभा मांय वित्त अर विनियोग बिल माथे व्ही चर्चा रो काल जवाब देता थकां सीएनजी अर पीएनजी माथे वेट टैक्स री रेट 10 फीसदी ऊं घटा र साढ़े 7 फीसदी करण रो ऐलाण कीनो हो।

000

प्रदेश मांय नुवा पश्चिमी विक्षोभ रा असर ऊं आज सिंज्यां भरतपुर अर जयपुर संभाग अर शेखावाटी हलका मांय कठे—कठे तेज बायरो बाजण सागे बिरखा व्ही। कठे—कठे ओला पड़बा रा ई समाचार है। डीग मांय ज़ोरदार बायरा सागे व्ही बिरखा ऊं केई ठौड़ां रुंखड़ा उखड़ ग्या। कोटपूतली—बहरोड़ मांय ई कठे—कठे बारिश व्हेवण सागे ओला पड़्या। मौसम केन्द्र जयपुर रा निदेशक राधेश्याम शर्मा बतायो के आवता दो—तीन दिन ऐड़ो ई मौसम रेहवण रा आसार है।

भारतीय अंतरिक्ष अनुसंधान संगठन—इसरो स्पेस डॉकिंग एक्सपेरिमेंट मिशन रा तहत दो उपग्रहां ने न्यारा करण री प्रक्रिया कामयाबी सागे पूरी कर लीनी है। इसरो कानी ऊं देश मांय ई विकसित करी ज्यी ई तकनीक री मदद ऊं अंतरिक्ष मांय उपग्रहां ने दूजा यान ऊं जोड़्या ज सकेला या न्यारा कर्या जा सकेला। अमेरिका, रूस अर चीन पाछे अब भारत कने ई आ तकनीक आ ग्यी है। ई उपलब्धि सारू विज्ञान अर प्रौद्योगिकी मंत्री जितेंद्र सिंह सोशल मीडिया पोस्ट रे जरिये वैज्ञानिकां ने बधाई दीनी है।

000

जयपुर रा जवाहर कला केन्द्र मांय 15 मार्च ऊं शक्ति वंदन महोत्सव मणायो जावेला। जयपुर ग्रेटर नगर निगम री ओर ऊं मणायो जावण वाळो ओ महोत्सव 17 मार्च ताई चालेला। ई दौरान लखपति दीदी योजना रा तहत चैक ई दिया जावेला। कला, संस्कृति अर शिक्षा समेत न्यारा—न्यारा हलका मांय सराहवणा जोगा काम करण वाळी महिलावां ने अहिल्याबाई होल्कर अवार्ड ऊं नवाजी जावेला। महिलावां ने माली तौर ऊं खुद रे पाण ऊबी करण सारू महोत्सव मांय स्थानीय उत्पादां ने बधावो देवण रा मकसद ऊं “वोकल फॉर लोकल” रा तहत 300 स्टॉल लगायी जावेला। ई रे अलावा महिलावां ऊं जुड़्या न्यारा—न्यारा मुद्दां माथे सत्र राख्या जावेला।

000

लोकसभा अध्यक्ष ओम बिरला आज वां रा संसदीय हलका कोटा—बून्दी रा चार दिन रा दौरा सारू पधार्या। श्री बिरला बांके बिहारी मंदिर ऊं निकळी फाग संकीर्तन परिक्रमा मांय सिरकत कीनी। तलवंडी ऊं सरू व्ही ई परिक्रमा मांय ऊर्जा मंत्री हीरालाल नागर, शिक्षा मंत्री मदन दिलावर अर विधायक समेत केई हस्तियां सिरकत कीनी। श्री बिरला रो सिंज्यां री पोर बाबा खाटू श्याम री भजन संध्या अर एक प्रतिभा सम्मान समारोह मांय सिरकत करण रो कार्यक्रम है। वां रो काल कैथूनीपोल रा वां रा रहवास माथे जनता सागे होळी मनावण अर एक शपथ ग्रहण समारोह मांय सिरकत करण रो कार्यक्रम है।

000

श्रीगंगानगर ज़िला रा गजसिंहपुर हलका मांय बी.एस.एफ. रा जवान पाकिस्तान ऊं लाग्योड़ी सरहद कने नशीली चीज हेरोइन पकड़ी है। बाज़ार मांय इण रो मोल करीब पांच करोड़ रुपया मानी ज्यो है। वठे रा लोगां कानी ऊं पाकिस्तान री ओर ऊं ड्रोन आवण री जाणकारी दिया पाछे बीएसएफ आ कार्यवाही कीनी।

000

प्रधानमंत्री नरेन्द्र मोदी ई महीना री तीस तारीख ने आकाशवाणी ऊं प्रसारित कर्या जावण वाळा खास कार्यक्रम मन की बात मांय विचार बतावेला। आ मन की बात कार्यक्रम री 120वीं कड़ी व्हेला। ई सारु आप ई 28 मार्च तांई मुफ्त नम्बर 1 8 0 0 – 1 1 – 7 8 0 0 माथे राय भेज सको हो। ई सागे ई 1922 नम्बर माथे मिस्ड कॉल दे र एस एम एस रे जरिये मिल्या लिंक ऊं ई सुझाव दिया जा सके है। ई रे अलावा नरेंद्र मोदी एप अर माई जीओवी ओपन फोरम रे मार्फत ई सुझाव दिया जा सके है।

000